

Dasar-dasar
Adat Perpatih

OLEH . ABDUL RAHMAN BIN HJ. MOHAMMAD

dasar-dasar adat perpatih

untuk anak2-ku :

- *zarina*
- *zarida*
- *zariati*
- *zaziani*

DASAR-DASAR ADAT PERPATEH

oleh

Abdul Rahman bin Hj. Mohammad



1964

PENERBITAN PUSTAKA ANTARA
KUALA LUMPUR.

BAB III

HIDUP BERKAUM-KAUM

Maka di-katakan-lah bahawa orang2 yang menganut Adat Perpatih itu melazimkan hidup bersuku-suku.

Sa-benar-nya kapada orang2 Adat Perpatih di-Negeri Sembilan dan di-Naning, perkataan Suku itu bererti Keluarga atau Kaum.

(Dahulu kala, apabila Adat Perpatih mula2 di-susun dan di-kuatkuasakan di-Minangkabau, para penduduk negeri itu terpaksa di-bahagikan ka-dalam empat pechahan, ia-itu pechahan2 Bodi, Chaniago, Koto dan Piliang. Tiap2 satu daripada pechahan2 yang empat itu di-panggil Suku, atau sa-perempat dari yang seluroh-nya. Jadi keempat-empat Suku Bodi, Chaniago, Koto dan Piliang itu merupakan Suku2 asal Minangkabau.)

Oleh yang demikian, apa yang di-maksudkan dengan hidup bersuku-suku itu ia-lah bahawasa-nya orang2 Adat Perpatih itu melazimkan hidup berkeluarga-keluarga atau hidup berkaum-kaum.

Ini ada-lah benar, kerana penduduk2 dalam masharakat Adat Perpatih itu di-bahagi2kan ka-dalam Suku2 mereka yang tersendiri.

Sa-tiap Suku mempunyai nama Suku-nya masing2, dan

satu2 Suku itu memang-lah merupakan satu ikatan besar orang2 yang sa-darah sa-daging, ia-itu yang satu Keluarga.

Tegas-nya semua orang yang sa-Suku itu hidup sa-bagai orang adek beradek, anak beranak, bersanak saudara belaka antara yang satu dengan yang lain.

Keturunan satu2 Suku mesti-lah di-susur galor dari titisan sa-belah ibu. Dengan ini bererti bahawa sa-saorang itu tiada-lah menjadi turunan ayah-nya, tetapi ia-nya tetap menjadi turunan ibu-nya.

Sekarang nama Suku2 yang di-pakai dalam Negeri Sembilan dan di-Naning ada dua belas kesemua-nya, sa-perti di-terangkan oleh gurindam ini:—

Raja beralam,
Penghulu berluak,
Lembaga berlingkongan,
Buapak beranak-buah,
Anak-buah dudok bersuku-suku,
Berapa Suku-nya?
Dua belas!

Suku yang dua belas itu ia-lah:—

1. Biduanda ('Dondo) atau Waris (Wareh)
2. Batu Hampar ('Tu-ampar)
3. Paya Kumboh (Payo Kumboh)
4. Mungka!
5. Tiga nenek (Tigo Nenek)
6. Seri Melenggang (Somolenggang)
7. Seri Lemak (Solomak)
8. Batu Belang ('Tu-Bolang)
9. Tanah Datar (Tolatar)
10. Anak Acheh ('Nak-cheh)
11. Anak Melaka ('Nak-Molako)
12. Tiga Batu (Tigo Batu)

Oleh yang demikian sa-tiap orang dalam masharakat Adat Perpatih itu bukan sahaja di-kenali oleh nama-nya

dan oleh nama ibubapa-nya, tetapi juga oleh nama Suku-nya.

Malah dengan keterangan nama Suku itu sa-saorang itu lebih senang dan mudah mengenal orang2 yang sa-darah sa-daging dengan-nya.

Kerana dalam tempat2 besar, apabila para penduduk-nya sudah berjumlah ramai, dengan pechahan2 dari satu2 Suku itu dudok berjauhan, maka tiada mengherankan kalau orang2 yang sa-Suku tiada mengenali antara satu dengan yang lain, di-sebabkan tiada pernah bersua.

Tetapi dengan menyebutkan nama Suku tahu-lah mereka sama ada mereka mempunyai pertalian darah atau tidak dengan orang2 yang di-sua itu.

Beberapa Soalan:

- (1) Apa-kah yang di-maksudkan dengan hidup bersuku-suku?
 - (2) Sa-tiap orang yang lahir dalam masharakat Adat Perpatih itu menjadi anak bapa-nya atau anak ibu-nya?
 - (3) Sebutkan nama empat Suku2 yang asal di-Minangkabau itu dahulu.
-

PENUTUP

Penyusun ingin mengingatkan bahawa buku ini hanya mencheritakan "Adat Perpateh" itu pada dasar-nya sahaja, kerana perbedzaan2 kechil-kechilan di-sana sini tetap di-dapati dari "Adat Perpateh" yang di-pakai di-Naning dengan yang di-pakai dalam Luak2 Negeri Sembilan dan juga di-Minangkabau; seperti di-katakan oleh pepatah: "Lain padang lain belalang, lain lubok lain ikan". Akan tetapi pada dasar-nya belalang itu belalang juga dan ikan itu ikan juga; dan demikian juga pada dasar-nya "Adat Perpateh" itu ada-lah sama belaka keadaan-nya di-tiap-tiap Luak dan Negeri tersebut.

Berhubung dengan Bab Kesabelas, penyusun meminta ma'af kerana tiada dapat menghurai, membinchang dan mencheritakan kesah "Raja Tiada Bernegeri" itu dengan sa-penoh-nya, kerana ia-nya sa-benar-nya merupakar sejarah Negeri Sembilan, yang sudah tentu akan lebeh sesuai di-binchang dan di-huraikan dalam sa-buah buku sejarah pula.

Di-sini juga penyusun ingin menyatakan bahawa susunan dan kekuasaan pemerintahan seperti telah di-cheritakan itu ada-lah yang telah betul2 di-jalankan di-waktu para penganut "Adat Perpateh" itu telah memerintah negeri2 mereka sendiri.

Kita semua tentu ma'alam bahawa sejak orang2 Minangkabau, Naning dan Negeri Sembilan di-perintah oleh Kuasa2 Penjajah (Belanda dan Inggeris), kuasa2 "Undang", "Lembaga" dan "Buapak" itu sudah banyak di-rampas dan di-perkechilkan.

Hari ini mereka itu hanya mempunyai kuasa menguruskan perkara2 kecil sahaja.

Kita juga terlebih ma'alam bahawa "Adat Perpateh" itu merupakan Falsafah Hidup satu bangsa "Petani".

Maka sama ada Falsafah Hidup itu sesuai atau tidak untuk satu masyarakat yang hidup "Dalam zaman Perindustrian"—seperti zaman yang kita tempoh sekarang—tiadalah penyusun bermaksud membinchangkan-nya pula.